

**Batwa nii sagi tə,  
Zwan  
nə púpúní  
Zwan batwa nii sagi tə yuu  
wa sɔɡv**

*Liù tə, v nə púpúní sagi kv tə*

Lià zənzən buŋa də, kv yi \*tuntɔnɔ Zwan nə púpúní kv. Zwan tə, v nə púpúní saga bələ tə duən tə, mə v mù nə púpúní kv tə də. U yà boŋə v tìàn <nəkwiɑ>.

*Liù tə nə, Zwan nə púpúní*

Zwan púpúní sagi kv tə, v pa liù don nə, ba nə boŋə Gayisə.

*Sagi tə wa sɔɡv*

U púpúní kv, v ma bu Gayisə nə, v nə twá Yu cígá tə nə, v ga saŋa \*Kərisə lià tə nə yiri. Kv kwa nə, v swìn bæɛ don yoo, ba nə boŋə Diyotərefə. U biri də, bæɛ təntə wà zəni fwa, v nə wà v sɔɡv tə jon, v ga wà sèe v pa, Kərisə lià tə zuri v diè wa yiri.

Kv mù təntə də kwa nə, v kúv b̀̀à liù don də nə, ba nə boŋə Demetəriyisə. U mù bæɛ təntə yi ləzwənzəŋu, v ga ya cígá tíú lià tə mama yáá con.

*Zwan j̀̀ǹ̀i Gayisə*

<sup>1</sup> À mù \*nəkwiɑ tə nə púpúní sagi kv tə, à pɪn n mù Gayisə nə. N yi liù tə, n yoo nə cà à nə

zənzən, à ga swə mú də cígá cígá sonu də. <sup>2</sup> À nubiswənə tə, à ylori nə ya, sə won mama kwən ku pa mú, sə n yazurə də ya zəni, sə n ga twá Zwezi-\*Kərisə nə zəni.

*Gayisə zílí Yı cígá tə nii zəni  
(Matíə 10.40-42)*

<sup>3</sup> À pùé poli zənzən, máǵá tə wa, \*Kərisə là duən nə twi nə con, ba swìn n yoo də, nətu tə, n nə yèé Yı cígá tə. Ba bırı, nətu n nə zílí Yı cígá tə nii. <sup>4</sup> À ba pupwən don jə ka nə kúð dwə, à nə nì də, ba swìn də, à bıa tə zílí Yı cígá tə nii. <sup>5</sup> À nubiswənə tə, n yı liù tə, n nə fwa zəni là tə yıra, ba nə yı nubia Kərisə yırı, ba nə yı vərə tətə. Ku nətu bırı də, n twá \*Yuu-Tiu nə də pùé nədu. <sup>6</sup> Ba swìn n sonu tə yoo, ba bırı Kərisə là púlí tə yáá con. À lòrì mú, sə n san ba, sə ba wàní ba kèèń, ba va ba cwəǵə tə. Fwa nətu, sə ku pa dun Yı nə. <sup>7</sup> Ku ya ba nan, sə ba swìn Yuu-Tiu yırı tə yoo ba bırı. Yá ba ga wà won mama jon là tə con, ba nə yèrì Zwezi-Kərisə. <sup>8</sup> Nə mù Kərisə là tə dàń nə mə, sə nə san ba mù là təntə nə, sə ku pa, nə mù də ba mù mə ya tütùná Yı cígá tə yırı.

*Diyotərəfə də Demetəriyisə yoo  
(Likə 20.46-47; 1 Korəntə tián 4.18-21; 1 Piyerə 2.12)*

<sup>9</sup> À púpúní sagı kukuə, à pa \*Kərisə là púlí tə nə. Yá Diyotərəfə, ɒ nə swə, sə ɒ ya ba yáá tíú tə, vıga, sə ɒ zílí nə nii. <sup>10</sup> Ku mù nə pın, máǵá tə wa, à nə wá bà, à wá líí aba tütünkükwınan tə, ɒ nə tuǵa. À wá líí aba sùràn tə, də kunkun

tə də, ʋ nə kɔnɪ ʋ kəni nə nii nə. Yá də ʋ nə fwa nɛtʋ tə mama, kʋ tə wà ʋ fɪra yí. Kʋ mù nə pɪn, ʋ dān vɪ, sə ʋ jon là tə duən tə, ba nə yɪ nubɪa Kərisə yɪrɪ, ba nə twi á con, ʋ kə ʋ diè wa. Nubɪa tə duən nə pìà ba jon ba, ba kə ba diè wa, ʋ yáá caga ba nii nə. Yá ʋ ga dɪŋɪ ba mù là tɛntə, ba nə pìà ba jon ba, ʋ lɪ Kərisə là púlí tə wa.

<sup>11</sup> À nubiswənə, n mù dān ká twá n kwè yolwan fàŋú. N mɛ, sə n kwè, kʋ tə nə zɪən fàŋú. Liù tə, ʋ nə fwa zəni, ʋ ya Yɪ nə tɪ wá. Yá liù tə, ʋ nə fwa yolwan, ʋ yèrɪ Yɪ tətə.

<sup>12</sup> Ba mama swìn Demetəriyisə zəni tə yoo. Yá Yɪ cígá tə də tətə bɪrɪ ʋ zəni tə. Nə də swìn ʋ zəni tə yoo nə bɪrɪ. Yá kʋ tə, nə nə swìn tə yɪ cígá.

### *Sagɪ tə yígúré sùràn*

<sup>13</sup> À jə yìèn zənzən, à nə pìà, sə à swìn n con. Yá à ga ba pìà, sə à púpúní tə sagɪ wa də púpúná mɪa. <sup>14</sup> À buŋa də, à wá na mú síún, sə nə swìn duən con də níé.

<sup>15</sup> Yɪ nə wá pa mú bɪcan sié. N dabara tə də jònɪ mú. Vəli nə dabara tə liù mama con, n jon wá n pa nəba.

**Yu soywánó sagı**  
**Nuni, Southern: Yu soywánó sagı New Testament**  
**Le Nouveau Testament en Nun**

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

d18530a7-7259-5f23-92b6-70e3abe5f3fa